



Sta voxe la xe stada scrivesta co la variansa dita venesian e sensa na grafia.

Ła **vita**, dal pònto de vista de ła biologia, ła xé ła condision che ła destingue ła materia vivènte da ła materia inanemada. El conceto de vita el xé donca el contrario de queło de morte soło in parte, in quanto ła morte ła xé ła fin de ła vita, e no ła xé ła condision de ła materia che no ła ga mai avùo vita. Ła vita ła xé particolarixada anca da un só **siclo vital**. Ogni èser vivènte el ga el só siclo vital.

La maxor parte de łe religion łe ga introdoto el conceto de vita daspò ła morte, respondéndo a na domanda che da sèmpre l'omo el se fa. Secondo sto conceto qua, ła morte no ła raprexènta na fin, ma un cambiamento, che'l capità in maniere e co signifegai desferènti a seconda de ła dotrina spesifega de ogni religion. Ghe xé filoxofie che łe revarda dretamènte ła vita e 'nte ła socetà umana ła vien considerada un valor fundamental, e par defènderla i ómeni i ga scomensà ła medexina.




Organismi vivènti

Ła vita ła xé prexènte 'nte i organismi vivènti ma anca in unità menóre, overosìa in parte de un organismo, divixe dal resto del'organismo steso. Sta roba qua łe càpita par exèmpio con łe culture selulari, o anca co òrgani, levai via da un donator e mesi drènto 'nte un pasiènte o anca col ràxoło, parte de n'organismo vegetal bon de créser fin a riprodur ła pianta orixenal.

N'organismo vivènte el xé particolarixà, in mexura più o manco signifegativa, da ste carateristeghe qua:

1. Còdex e o informasion genètega (contegnùo 'ntel'RNA o 'ntel DNA). Sto còdex e el règoła ła formasion e' l'funzionamènto del'organismo;
2. El xé bon de adatarse a łe condisioni anbientali e reasion ai stìmoli;
3. Individualixasion, overosìa separasion dal'altro da sè (da ła sènplexe membrana selular a ła pele e al'exoschèletro);
4. El xé bon de riprodurse e créser, grasie al metabolismo, che'l prevede scanbi energètegghi e uxo de materia par ła creasion del só corpo.
5. El mor, a ła fin del só siclo



Grupo de *Halobacteria* uniselulari

Un caxo particolàr el xé raprexentà dai virus, sui quali el xé parla par stabilìr se i xé na vèra forma de vita. Su ła tera i sicli vitali cognosui fin deso i se sviłupa datorno ai elemènti Chnops, ma sta roba no ła stabilise che no łe posa exìster altre serie de elemènti datorno a łe quali łe se posa crearse sistemi de vita alternativi.

Łe carateristeghe fondamentali dei vivènti i xé ste qua:

- Selularità: tuti i èseri vivènti i xé costituii da unità struturàli e funzionali elementari, ciamae sèlule, bone de svòlzer tute le funsion propie dei vivènti. Le sèlule, infati, le nase, le se nùdriga, le crese, le se reproduce e le mor. I più sènplexi organismi vivènti i xé costituii da na sìnghola sèlula pìcenina; cusì par exèmpio, i bateri, paréce spece de àleghe e i levà. Altri organismi, come le piante, i anemali e squaxi tuti i fóngghi, i xé formai da n'alto nùmero de sèlule. Le sèlule che le costituise un organismo pluriselular le pol èser stretamente saldae le une co le altre o èser bastansa libere e indipendènti. In ogni caxo, i xé in comunicasion chìmega infrà de lóre par formar el complesso integrà del'organismo.

- Complesità: i vivènti i xé èseri complessi e altamente integrai. Un baterio, che'l xé na de le forme de vita più sènplexi e pìcole, el xé fato, a ocio, da 7 000^[2] sostanse chìmeghe desferènti. Ognuna la ga na sóa funsion biolòxica ben precisa e la ga da èser sèmpre prexènte 'nte la quantità giusta par el bon funzionamento del baterio. Daspò, se considerèmo l'omo, overosja l'organismo più complesso infrà tuti, se descovre che'l xé costituiò da almanco 10 000 triliòni^[3] de sèlule; ste qua, a só volta, le xé conposte da dexéne de mière de sostanse chìmeghe desferènti destribuè in numeroxe strutture ultramicroscòpiche (orgànuli selulari). 'Ntel corpo uman le sèlule le xé desferensiae in doxènto tipi desferènti a ocio. I vari tipi de sèlule i xé organixai in tesù che, a só volta, i forma i òrgani. I òrgani i costituise i sistemi e i paramènti e sti qua i se ìntrega a formar l'organismo.

- Informasion: el mantegnir e'l trasméter de generasion in generasion de la complessità dei vivènti i domanda na quantità de informasion che, anca par el più sènplexe de sti qua, el xé superior a que la contegnua 'nte na granda ensiclopedia. Ogni struttura e ogni attività, da la sìnghola molècola al'intrego organismo, da la nasua a la morte, le xé codifegae in quei ciamai geni. I geni i xé formai da la molècola de DNA serada 'ntei cromosomi del nùcleo selular. Ogni gene el “contien” n'informasion che, da volta in volta, la pol èser modulada e coordinada co quella de altri geni. Ghe rexulta n'armònego e complesso sistema che'l guida le attività svolte da le desferènti sèlule miga solo 'ntel'organismo cresùo, ma anca durante la sóa cresua.

- Metabolismo: “Metabolismo” el signìfega trasformasion. Defati, ogni organismo el va incontro a filae trasformasion fate necesarie dal mantegnir la sóa complessa struttura, da la cresua e dai filai adattamènti al'ambiènte. Più propriamente, par metabolismo se intende quel complesso de bèn organixae reasion chìmeghe bone de sfrutar energia esterna par renovar, acrésar o giustar le strutture del'organismo. Tuta sta roba la ga bixogno, aponto, de na trasformasion continuada de numeroxe molècole. L'alimentasion, la respirasion e l'escresion le xé l'espresion più ciara e palpàbile dei procesi metabòlisi che i se fa 'nte n'organismo.



Biston betularia, na pavegia, exèmpio perfeto de evolusion e mutasion: na volta sti bai i viveva su le brèdole e i gera tuti bianchi. L'inquinamento el ga ontà le scorse e la se ga difuxa la forma negra, mutasion vantagévole che la se ga adadata grazie al novo stato dei àlbori e ancuo la vive insieme a quella bianca.^[1]



Farfale che le xé drio acopiarse.



Leoni che i casa

- **Reproduzion:** ogni vivénte el xé bon de riprodursee, overosia de xenerar altri organismi somegianti a sè stéso. N'organismo uniselular el desdopia el só DNA, el devénta piú grand e l se divide in dó sèlule fie che le eredità na de le dó copie del DNA. 'Ntei èseri pluriselulari, invese, la reproduzion el se fa traverso la fuxion de dó sèlule (dite gameti), prodote da dó individui del'altro seso. El rexultà de sta fuxion qua la se ciama zigote e l xé na sèlula che la contien mexo DNA che l vien dal pare, e mexo da la mare. L'individuo che l salta fora dal zigote el somegia ai genitori, ma l sarà desferénte da tuti dó. In sta maniera, a ogni generasion ghe saltarà fora sèmpre nove varianti de la stesa spece.



Èlexe (*Quercus ilex*) - le piante le xé autòtrofe e le xé a la baxe de la càena alimentar dei anemali.

- **Svilùpo:** la cresùta la xé n'aspeto carateristego dei organismi vivénti. Anca i bateri i se sgrandise, anca se de poco, daspò na divizion riprodutiva. Di sòlito, 'nnei organismi superiori el zigote el se divide piú volte fin a formar mière de milioni de sèlule. La cresùta la xé conpagnada da la conparsa de novi tipi selulari, de novi tesù e de novi òrgani.
- **Evolusion:** traverso la reproduzion, i genitori i trasméte al fio parte dei sói geni, overosia na parte del só material ereditario. Par sta roba el fio no l rexulta del tuto ugual né al pare né a la mare, ma l ga caràteri ereditari de tuti dó. In piú el poderia poseder anca qualche carateristega nova che no la ghe gera 'nnei sói antenai. Un novo caràtere, o mutasion, la se orixena in conseguénsa del fato che el material ereditario el vien trasmeso un fià alterà respeto a quel orixenal. L'ingurumada de ste variasion 'ntel témpo e 'ntel spasio el pol portar a la formasion de organismi co carateristeghe strutturali par vèro desferénti. In sto modo qua, 'ntel corso de le ere geològiche, le nove spece de organismi vivénti le ga avùo orixene. Ténte anàlize e studi profondi i testimonia che la granda varietà dei organismi vivénti de ancuo la se ga orixenada traverso un proceso ciamaà evolusion. Sto qua no l xé altro che el rexultà de le variasion genèteghe sumàe 'ntel'arco de témpo che l divide le prime forme de vita da quele de ancuo.
- **Interasion:** tuti i organismi vivénti i interagise col'anbiénte e infrà de lori. Savémo che na pianta par créser la ga bixogno de aqua, de sal minerali, de anidride carbònica, de luxe e de osìgeno: ela la tol tute ste "materie prime" qua dal'anbiénte fìxico. La só maxor o menor disponibilità la gavarà conseguénsa su la sóa crésita e la sóa multiplicasion. Anca la tenperadura, la pióva, el vénto, la latitudine e l'altitudine le influise su la vita de le piante. Le piante le sta a la baxe del'alimentasion par i anemali e par l'omo, che da lore i cava via "materie prime" e energia.

Fonte

1. Biston betularia (http://www.pd.astro.it/othersites/altrimondi/prot02_117/biston_betularia_ddt.htm)
2. Distinguere i vivénti (<http://www.isisromero.it/Members/friva/biologia-classi-seconde/classificazione/def%20vivalenti.pdf>)
3. Nùmeri del corpo uman (http://www.windoweb.it/dossier/numeri_incredibili_guinness/guinness_2.htm)

Altri progetti

-  **Wikimedia Commons** (<https://commons.wikimedia.org/wiki/?uselang=en>) el detien imàjini o altri file so **Vita** (<https://commons.wikimedia.org/wiki/Category:Life?uselang=vec>)

GND (DE) 4034831-3 (<https://d-nb.info/gnd/4034831-3>) · BNF (FR) cb11933780m (<https://catalogue.bnf.fr/ark:/12148/cb11933780m>) (data) (<https://data.bnf.fr/ark:/12148/cb11933780m>) · NDL (EN, JA) 00570344 (<https://id.ndl.go.jp/auth/ndlna/00570344>)

Ùltimo canbiamento de sta pàgina el 16 luj 2020 a Ìe 18:51.

El testo el xé disponibile segondo la licensa Creative Commons Atribusion-Condividi n'te la stesa manjiera; e pole aplicarse oncora pì condision. Varda le condision d'uxo par i detaji.